

**সংকল্প ও স্বদেশ**



সেদিন কি তুমি এসেছিলে ওগো, সে কি তুমি, মোর সভাতে ।

হাতে ছিল তব বাঁশি,

অধরে অবাক হাসি,

সেদিন ফাগুন মেতে উঠেছিল মদিরবিকল শোভাতে ।

সে কি তুমি ওগো, তুমি এসেছিলে সেদিন নবীন প্রভাতে

নবযৌবনসভাতে ।

সেদিন আমার যত কাজ ছিল সব কাজ তুমি ভুলালে

খেলিলে সে কোন্ খেলা।

কোথা কেটে গেল বেলা

টেউ দিয়ে দিয়ে হৃদয়ে আমার রক্তকমল ছুলালে ।

পুলকিত মোর পরানে তোমার বিলোল নয়ন বুলালে,

সব কাজ মোর ভুলালে ।

তার পরে হায় জানি নে কখন ঘুম এল মোর নয়নে ।

উঠিনু যখন জেগে,

ঢেকেছে গগন মেঘে--

তরুতলে আছি একেলা পড়িয়া দলিতপত্রশয়নে ।

ভোমাতে আমাতে রত ছিনু যবে কাননে কুমুমচয়নে

ঘুম এল মোর নয়নে ।

সেদিনের সভা ভেঙে গেছে সব আজি ঝরঝর বাদরে ।  
 পথে লোক নাহি আর,  
 রুদ্ধ করেছি দ্বার,  
 একা আছে প্রাণ ভূতলশয়ান আজিকার ভরা ভাদরে ।  
 তুমি কি ছুয়ারে আঘাত করিলে— তোমারে লব কি আদরে  
 আজি ঝরঝর বাদরে ।

তুমি যে এসেছ ভস্মমলিন তাপসমুরতি ধরিয়া ।  
 স্তিমিত নয়নতারা  
 ঝলিছে অনল-পারা,  
 সিক্ত তোমার জটাজুঁ হতে সলিল পড়িছে ঝরিয়া ।  
 বাহির হইতে ঝড়ের আঁধার আনিয়াছ সাথে করিয়া  
 তাপসমুরতি ধরিয়া ।

নমি হে ভীষণ, মৌন, রিক্ত, এসো মোর ভাঙা আলয়ে ।  
 ললাটে তিলকরেখা  
 যেন সে বহ্নিলেখা,  
 হস্তে তোমার লৌহদণ্ড বাজিছে লৌহবলয়ে ।  
 শূন্য ফিরিয়া যেয়ো না, অতিথি, সব ধন মোর না লয়ে ।  
 এসো এসো ভাঙা আলয়ে ।

## ভৈরবী গান

- ওগো কে তুমি বসিয়া উদাসমুরতি  
বিষাদশান্ত শোভাতে ।
- ওই ভৈরবী আর গেলো নাকো এই  
প্রভাতে ।
- মোর গৃহছাড়া এই পথিকপরান  
তরুণহৃদয় লোভাতে ।
- ওই মন-উদাসীন, ওই আশাহীন  
ওই ভাষাহীন কাকলি  
দেয় ব্যাকুল পরশে সকল জীবন  
বিকলি ।
- দেয় চরণে বাঁধিয়া প্রেমবাহু-ঘেরা  
অশ্রুকোমল শিকলি ।
- হায় মিছে মনে হয় জীবনের ত্রুত,  
মিছে মনে হয় সকাল ।
- যারে ফেলিয়া এসেছি, মনে করি, তা  
ফিরে দেখে আসি শেষবার—  
ওই কাঁদিছে সে যেন এলায়ে আকুল  
কেশভার ।

- যারা গৃহছায়ে বসি সজলনয়ন  
মুখ মনে পড়ে সে-সবার ।
- সেই সারা দিনমান স্নিভূত ছায়া,  
তরুর্মর পবনে,  
সেই মুকুল-আকুল বকুলকুঞ্জ-  
ভবনে  
সেই কুহুকুরিত বিরহরোদন  
থেকে থেকে পশে শ্রবণে ।
- সেই চিরকলতান উদার গঙ্গা  
বহিছে আধারে আলোকে,  
সেই তীরে চিরদিন খেলিছে বালিকা-  
বালকে ।  
ধীরে সারা দেহ যেন মুদিয়া আসিছে  
স্বপ্নপাখির পালকে ।
- সদা করুণ কণ্ঠে কাঁদিয়া গাহিব—  
“হল না, কিছুই হবে না,  
এই মায়াময় ভবে চিরদিন কিছু  
রবে না ।

কেহ জীবনের যত গুরুভার ব্রত  
 ধূলি হতে তুলি লবে না ।

এই সংশয়-মাঝে কোন্ পথে যাই,  
 কার তরে মরি খাটিয়া,  
 আমি কার মিছে হুখে মরিতেছি বুক  
 ফাটিয়া ।

ভবে সত্য মিথ্যা কে করেছে ভাগ,  
 কে রেখেছে মত ঝাঁটিয়া ।

যদি কাজ নিতে হয় কত কাজ আছে  
 একা কি পারিব করিতে ।

কাঁদে শিশিরবিন্দু জগতের তৃষা  
 হরিতে ।

কেন অকুল সাগরে জীবন সঁপিব  
 একেলা জীর্ণ তরীতে ।

শেষে দেখিব, পড়িল সুখযৌবন  
 ফুলের মতন খসিয়া —  
 হায় বসন্তবায়ু মিছে চলে গেল  
 খসিয়া ।

সেই যেখানে জগৎ ছিল এক কালে  
সেইখানে আছে বসিয়া ।”

ওগো, থামো, যারে তুমি বিদায় দিয়েছ  
তারে আর ফিরে চেয়ো না ।

ওই অক্ষয়জল ভৈরবী আর  
গেয়ো না ।

আজি প্রথম প্রভাতে চলিবার পথ  
নয়নবাষ্পে ছেয়ো না ।

ওই কুহকরাগিণী এখনি কেন গো  
পথিকের প্রাণ বিবশে ।

পথে এখনো উঠিবে প্রখর তপন  
দিবসে ।

পথে রাক্ষসী সেই তিমিররজনী  
না জানি কোথায় নিবসে ।

থামো, শুধু একবার ডাকি নাম তাঁর  
নবীন জীবন ভরিয়া,

যাব যঁার বল পেয়ে সংসারপথ  
ভরিয়া,



যত মানবের গুরু মহৎ-জনের  
চরণচিহ্ন ধরিয়া ।  
সদা সহিয়া চলিব প্রথর দহন,  
নিষ্ঠুর আঘাত চরণে ।  
যাব আজীবন কাল পাষণকঠিন  
সরণে ।  
যদি মৃত্যুর মাঝে নিয়ে যায় পথ  
সুখ আছে সেই মরণে ।

## এবার ফিরাও মোরে

সংসারে সবাই যবে সারাক্ষণ শত কর্মে রত,  
 তুই শুধু ছিন্নবাধা পলাতক বালকের মতো  
 মধ্যাহ্নে মাঠের মাঝে একাকী বিষণ্ণ তরুচ্ছায়ে  
 দূরবনগন্ধবহ মন্দগতি ক্লাস্ত তপ্তবায়ে  
 সারাদিন বাজাইলি বাঁশি ।— ওরে, তুই ওঠ্ আঞ্জি ।  
 আগুন লেগেছে কোথা । কার শব্দ উঠিয়াছে বাজি  
 জাগাতে জগৎ-জনে । কোথা হতে ধ্বনিছে ক্রন্দনে  
 শূন্যতল । কোন্ অন্ধকারা-মাঝে জর্জর বন্ধনে  
 অনাথিনী ঝুঁগিছে সহায় । স্বীতকায় অপমান  
 অক্ষমের বক্ষ হতে রক্ত শুষি করিতেছে পান  
 লক্ষ মুখ দিয়া । বেদনারে করিতেছে পরিহাস  
 স্বার্থোদ্ধত অবিচার । সংকুচিত ভীত ক্রীতদাস  
 লুকাইছে ছদ্মবেশে । 'ওই-যে দাঁড়ায়ে নতশির  
 যুক্ সবে — ম্লানমুখে লেখা শুধু শত শতাব্দীর  
 বেদনার করুণ কাহিনী ; স্বন্ধে যত চাপে ভার  
 বহি চলে মন্দগতি যতক্ষণ থাকে প্রাণ তার,  
 তার পরে সম্তানেরে দিয়ে যায় বংশ বংশ ধরি ;  
 নাহি ভৎসে অদৃষ্টেরে, নাহি নিন্দে দেবতারে স্মরি,  
 মানবেরে নাহি দেয় দোষ, নাহি জানে অভিমান,  
 শুধু ছুটি অন্ন খুঁটি কোনোমতে কষ্টক্লিষ্ট প্রাণ

রেখে দেয় বাঁচাইয়া । সে অন্ন যখন কেহ কাড়ে,  
 সে প্রাণে আঘাত দেয় গর্বাঙ্ক নিষ্ঠুর অত্যাচারে,  
 নাহি জানে কার দ্বারে দাঁড়াইবে বিচারের আশে ;  
 দরিদ্রের ভগবানে বারেক ডাকিয়া দীর্ঘশ্বাসে  
 মরে সে নীরবে । এইসব মূঢ় ম্লান মুক মুখে  
 দিতে হবে ভাষা ; এইসব শ্রান্ত শুষ্ক ভগ্ন বুক  
 ধ্বনিয়া তুলিতে হবে আশা ; ডাকিয়া বলিতে হবে—  
 “মুহূর্ত তুলিয়া শির একত্র দাঁড়াও দেখি সবে ।  
 (যার ভয়ে তুমি ভীত সে অন্ডায় ভীকু তোমা-চেয়ে,  
 যখনি জাগিবে তুমি তখনি সে পলাইবে ধেয়ে )  
 যখনি দাঁড়াবে তুমি সম্মুখে তাহার, তখনি সে  
 পথকুকুরের মতো সংকোচে সত্রাসে যাবে মিশে ।  
 দেবতা বিমুখ তারে, কেহ নাহি সহায় তাহার ;  
 মুখে করে আফালন, জানে সে হীনতা আপনার  
 মনে মনে

কবি, তবে উঠে এসো— যদি থাকে প্রাণ  
 তবে তাই লহো সাথে, তবে তাই করো আজি দান ।  
 বড়ো ছুঃখ, বড়ো ব্যথা— সম্মুখেতে কষ্টের সংসার  
 বড়োই দরিদ্র, শূন্য, বড়ো ক্ষুদ্র, বন্ধ, অন্ধকার ।  
 অন্ন চাই, প্রাণ চাই, আলো চাই, চাই মুক্ত বায়ু,  
 চাই বল, চাই স্বাস্থ্য, আনন্দ-উজ্জল পরমায়ু,

সাহসবিস্তৃত বক্ষপট । এ দৈন্ত-মাঝারে, কবি,  
একবার নিয়ে এসো স্বর্গ হতে বিশ্বাসের ছবি ।

এবার ফিরাও মোরে, লয়ে যাও সংসারের তীরে  
হে কল্পনে, রঙ্গময়ী ! ছুলায়ো না সমীরে সমীরে  
তরঙ্গে তরঙ্গে আর, ভুলায়ো না মোহিনী মায়ায় ।  
বিজ্ঞন বিষাদঘন অন্তরের নিকুঞ্জচ্ছায়ায়  
রেখো না বসায়ের আর । দিন যায়, সন্ধ্যা হয়ে আসে ।  
অন্ধকারে ঢাকে দিশি, নিরাশ্বাস উদাস বাতাসে  
নিশ্বসিয়া কেঁদে ওঠে বন । বাহিরিছু হেথা হতে  
উন্মুক্ত-অশ্বর-ভঁলে, ধূসরপ্রসর রাজপথে,  
জনতার মাঝখানে ।— কোথা যাও, পান্থ, কোথা যাও ।  
আমি নহি পরিচিত, মোর পানে ফিরিয়া তাকাও ।  
বলো মোরে নাম তব, আমারে কোরো না অবিশ্বাস ।  
সৃষ্টিছাড়া সৃষ্টিমাঝে বহুকাল করিয়াছি বাস  
সঙ্গীহীন রাত্রিদিন ; তাই মোর অপরূপ বেশ,  
আচার নূতনতর ; তাই মোর চক্ষে স্বপ্নাবেশ,  
বক্ষে জ্বলে ক্ষুধানল ।— যেদিন জগতে চলে আসি  
কোন্ মা আমারে দিলি শুধু এই খেলাবার বাঁশি !  
বাজাতে বাজাতে তাই মুগ্ধ হয়ে আপনার সুরে  
দীর্ঘদিন দীর্ঘরাত্রি চলে গেলু একান্ত সুদূরে  
ছাড়িয়ে সংসারসীমা । সে বাঁশিতে শিখেছি যে সুর

তাহারি উল্লাসে যদি গীতশূণ্য অবসাদপুর •  
 ধ্বনিয়া তুলিতে পারি, মৃত্যুঞ্জয়ী আশার সংগীতে  
 কর্মহীন জীবনের এক প্রান্ত প্যারি তরঙ্গিতে  
 শুধু মুহূর্তের তরে, ছুঃখ যদি পায় তার ভাষা,  
 সৃষ্টি হতে জেগে ওঠে অন্তরের গভীর পিপাসা  
 স্বর্গের অমৃত লাগি— তবে ধন্য হবে মোর গান,  
 শত শত অসন্তোষ মহাগীতে লভিবে নির্বাণ ।

কী গাহিবে, কী শুনাবে । (বেলো, মিথ্যা আপনার স্তম্ভ  
 মিথ্যা আপনার ছুঃখ । স্বার্থমগ্ন যে জন বিমুখ  
 বৃহৎ জগৎ হতে, সে কখনো শেখে নি বাঁচিতে  
 মহাবিশ্বজীবনের তরঙ্গেতে নাচিতে নাচিতে  
 নির্ভয়ে ছুটিতে হবে সত্যেরে করিয়া ঋণতারা ।  
 মৃত্যুরে করি না শঙ্কা । হৃদিনের অশ্রুজলধারা  
 মস্তকে পড়িবে ঝরি, তারি মাঝে যাব অভিসারে,  
 তার কাছে— জীবনসর্বস্বধন অর্পিয়াছি যারে  
 জন্ম জন্ম ধরি । কে সে । জানি না কে । (চিনি নাই তারে—  
 শুধু এইটুকু জানি, তারি লাগি রাত্রি-অন্ধকারে  
 চলেছে মানবযাত্রী যুগ হতে যুগান্তর-পানে  
 ঝড়ঝঞ্ঝা-বজ্রপাতে আলায়ে ধরিয়া সাবধানে  
 অন্তরপ্রদীপখানি । শুধু জানি, যে শুনেছে কানে  
 তাহার আস্থানগীত ছুটেছে সে নির্ভীকপরানে

সংকট-আবর্ত-মাঝে, দিয়েছে সে বিশ্ব বিসর্জন,  
 নির্যাতন লয়েছে সে বন্ধ পাতি, মৃত্যুর গর্জন  
 শুনেছে সে সংগীতের মতো । দহিয়াছে অগ্নি তারে,  
 বিদ্ধ করিয়াছে শূল, ছিন্ন তারে করেছে কুঠারে ;  
 সর্বপ্রিয়বস্তু তার অকাতরে করিয়া ইক্ষন  
 চিরজন্ম তারি লাগি জ্বলেছে সে হোমহতাশন ।  
 হৃৎপিণ্ড করিয়া ছিন্ন রক্তপদ্ম-অর্ঘ্য-উপহারে  
 ভক্তিভরে জন্মশোধ শেষ পূজা পূজিয়াছে তারে  
 মরণে কৃতার্থ করি প্রাণ । শুনিয়াছি, তারি লাগি  
 রাজপুত্র পরিয়াছে ছিন্ন কস্থা, বিষয়ে বিরাগী  
 পথের ভিক্ষুক ; মহাপ্রাণ সহিয়াছে পলে পলে  
 সংসারের ক্ষুদ্র উৎপীড়ন— বিধিয়াছে পদতলে  
 প্রত্যাহের কুশাস্কুর, করিয়াছে তারে অবিশ্বাস  
 মৃত্ত বিজ্ঞজনে, প্রিয়জন করিয়াছে পরিহাস  
 অতিপরিচিত অবজ্ঞায় ; গেছে সে করিয়া ক্ষমা  
 নীরবে করুণনেত্রে, অন্তরে বহিয়া নিরুপমা  
 সৌন্দর্যপ্রতিমা ৷ তারি পদে মানী সঁপিয়াছে মান,  
 ধনী সঁপিয়াছে ধন, বীর সঁপিয়াছে আত্মপ্রাণ ;  
 তাহারি উদ্দেশে কবি বিরচিয়া লক্ষ লক্ষ গান  
 ছড়াইছে দেশে দেশে । শুধু জানি, তাহারি মহান্  
 গন্তীর মঙ্গলধ্বনি শুনা যায় সমুদ্রে সমীরে ।  
 তাহারি অঞ্চলপ্রাপ্ত লুটাইছে নীলাশ্বর ঘিরে ;

তারি বিশ্ববিজয়িনী পরিপূর্ণা প্রেমমূর্তিখানি  
 বিকাশে পরমক্ষণে প্রিয়জনমুখে । শুধু জানি,  
 সে বিশ্বপ্রিয়ার প্রেমে ক্ষুদ্রতারে দিয়া বলিদান  
 বর্জিতে হইবে দূরে জীবনের সর্ব অসম্মান ;  
 সম্মুখে দাঁড়াতে হবে উন্নতমস্তক উচ্চে তুলি  
 যে মস্তকে ভয় লেখে নাই লেখা, দাসত্বের ধূলি  
 ঝাঁকে নাই কলঙ্কতিলক । তাহারে অন্তরে রাখি  
 জীবনকণ্টকপথে যেতে হবে নীরবে একাকী  
 সুখে দুঃখে ধৈর্য ধরি, বিরলে মুছিয়া অশ্রু ঝাঁখি,  
 প্রতি দিবসের কর্মে প্রতিদিন নিরলস থাকি  
 স্মৃষ্টি করি সর্বজনে । তার পরে দীর্ঘ পন্থশেষে  
 জীবযাত্রা-অবসানে ক্লান্তপদে রক্তসিক্তবেশে  
 উত্তরিব একদিন শ্রান্তিহরা শান্তির উদ্দেশে  
 দুঃখহীন নিকেতনে । প্রসন্নবদনে মন্দ হেসে  
 পরাবে মহিমালক্ষ্মী ভক্তকণ্ঠে বরমাল্যখানি,  
 করপদ্যপরশনে শাস্ত হবে সর্ব দুঃখ গ্লানি  
 সর্ব অমঙ্গল । লুটাইয়া রক্তিম চরণতলে  
 ধৌত করি দিব পদ আজন্মের রুদ্ধ অশ্রুজলে ।  
 স্মৃতিরসঞ্চিত আশা সম্মুখে করিয়া উদ্ঘাটন  
 জীবনের অক্ষমতা কাঁদিয়া করিব নিবেদন,  
 মাগিব অনন্তক্ষমা । হয়তো যুচিবে দুঃখনিশা,  
 তৃপ্ত হবে এক প্রেমে জীবনের সর্বপ্রেমতৃষা ।

## বিদায়

এবার চলিছু তবে ।  
 সময় হয়েছে নিকট, এখন  
 বাঁধন ছিঁড়িতে হবে ।  
 উচ্ছল জল করে ছলছল,  
 জাগিয়া উঠেছে কলকোলাহল,  
 তরণীপতাকা চলচঞ্চল  
 কাঁপিছে অধীর রবে ।  
 সময় হয়েছে নিকট, এখন  
 বাঁধন ছিঁড়িতে হবে ।

আমি নিষ্ঠুর, কঠিন কঠোর,  
 নির্মম আমি আজি ।  
 আর নাই দেরি, ভৈরবভেরী  
 বাহিরে উঠেছে বাজি ।  
 তুমি যুমাইছ নিমীলনয়নে,  
 কাঁপিয়া উঠিছ বিরহস্বপনে,  
 প্রভাতে জাগিয়া শূন্য শয়নে  
 কাঁদিয়া চাহিয়া রবে ।  
 সময় হয়েছে নিকট, এখন  
 বাঁধন ছিঁড়িতে হবে ।



অরুণ তোমার তরুণ অধর,  
 করুণ তোমার আঁখি,  
 অমিয়রচন সোহাগবচন  
 অনেক রয়েছে বাকি ।  
 পাখি উড়ে যাবে সাগরের পার,  
 সুখময় নীড় পড়ে রবে তার,  
 মহাকাশ হতে ওই বারে বার  
 আমারে ডাকিছে সবে ।  
 সময় হয়েছে নিকট, এখন  
 বাঁধন ছিঁড়িতে হবে ।

(বিশ্বজগৎ আমারে মাগিলে  
 কে মোর আত্মপর ।  
 আমার বিধাতা আমাতে জাগিলে  
 কোথায় আমার ঘর ।)  
 কিসেরই বা সুখ, ক'দিনের প্রাণ ।  
 ওই উঠিয়াছে সংগ্রামগান,  
 অমর মরণ রক্তচরণ  
 নাচিছে সগৌরবে ।  
 সময় হয়েছে নিকট, এখন  
 বাঁধন ছিঁড়িতে হবে ।

## অশেষ

আবার আহ্বান ?

যত কিছু ছিল কাজ সাক্ষ তো করেছি আজ  
দীর্ঘ দিনমান ।

জাগায়ে মাধবীবন চলে গেছে বহুক্ষণ  
প্রত্যুষ নবীন,  
প্রথর পিপাসা হানি পুষ্পের শিশির টানি  
গেছে মধ্যদিন ।

মাঠের পশ্চিমশেষে অপরাহ্নে স্নান হেসে  
' হল অবসান,  
পরপারে উত্তরিতে পা দিয়েছি তরণীতে—  
আবার আহ্বান ?

নামে সন্ধ্যা তন্দ্রালসা সোনার-আঁচল-খসা,  
হাতে দীপশিখা ।  
দিনের কল্লোল-'পর টানি দিল ঝিল্লিস্বর  
ঘন যবনিকা ।

ও পারের কালো কুলে কালি ঘনাইয়া তুলে  
নিশার কালিমা,  
গাঢ় সে তিমিরতলে চক্ষু কোথা ডুবে চলে  
নাহি পায় সীমা ।

নয়নপল্লব-পরে স্বপ্ন জড়াইয়া ধরে,  
 থেমে যায় গান,  
 ক্লাস্তি টানে অঙ্গ মম প্রিয়ার মিনতিসম—  
 এখনো আহ্বান ?

রে মোহিনী, রে নিষ্ঠুরা, ওরে রক্তলোভাতুরা  
 কঠোর স্বামিনী,  
 দিন মোর দিহু তোরে, শেষে নিতে চাস হরে  
 আমার যামিনী ?

জগতে সবারই আছে সংসারসীমার কাছে  
 কোনোখানে শেষ,  
 কেন আসে মর্মচ্ছেদি সকল সমাপ্তি ভেদি  
 তোমার আদেশ ।

বিশ্বজোড়া অন্ধকার সকলেরই আপনার  
 একেলার স্থান,  
 কোথা হতে তারো মাঝে বিজাতের মতো বাজে  
 তোমার আহ্বান ।

দক্ষিণসমুদ্রপারে তোমার প্রাসাদদ্বারে  
 হে জাগ্রত রানী,  
 বাজে না কি সন্ধ্যাকালে শান্ত সুরে ক্লাস্ত তালে  
 বৈরাগ্যের বাণী ।



বলো তবে কী বাজাব,      ফুল দিয়ে কী সাজাব  
 তব দ্বারে আজ,  
 রক্ত দিয়ে কী লিখিব,      প্রাণ দিয়ে কী শিখিব,  
 কী করিব কাজ ।  
 যদি আঁখি পড়ে ঢুলে,      প্লথ হস্ত যদি ভুলে  
 পূর্ব নিপুণতা,  
 বন্ধে নাহি পাই বল,      চক্ষে যদি আসে জল  
 বেধে যায় কথা,  
 চেয়ো নাকো ঘৃণাভরে,      কোরো নাকো অনাদরে  
 মোরে অপমান ।  
 মনে রেখো হে নিদয়ে,      মেনেছিছু অসময়ে  
 তোমার আহ্বান ।

সেবক আমার মতো  
 তোমার ছয়ারে,  
 তাহারা পেয়েছে ছুটি,      ঘুমায় সকলে জুটি  
 পথের দু ধারে ।  
 শুধু আমি তোরে সেবি      বিদায় পাই নে, দেবী,  
 ডাক' ক্রমে ক্রমে ;  
 বেছে নিলে আমারেই,      ছরুহ সৌভাগ্য সেই  
 বহি প্রাণপণে ।



৫

সকলে আমার কাছে যত কিছু চায়  
 সকলেরে আমি তাহা পেরেছি কি দিতে ।  
 আমি কি দিই নি ফাঁকি কত জনে হায়,  
 রেখেছি কত-না ঋণ এই পৃথিবীতে ।  
 আমি তবে কেন বকি সহস্র প্রলাপ,  
 সকলের কাছে চাই ভিক্ষা কুড়াইতে,  
 একতিল না পাইলে দিই অভিশাপ,  
 অমনি কেন রে বসি কাতরে কাঁদিতে ।

হা ঈশ্বর, আমি কিছু চাই নাকো আর,  
 ঘুচাও আমার এই ভিক্ষার বাসনা ।  
 মাথায় বহিয়া লয়ে চির ঋণভার  
 'পাই নি' 'পাই নি' বলে আর কাঁদিব না ।

তোমারেও মাগিব না, অলস কাঁদনি—  
 আপনারে দিলে তুমি আসিবে আপনি ।

আঘাতসংঘাত-মাঝে দাঁড়াইনু আসি ।  
 অঙ্গদ কুণ্ডল কণ্ঠি অলংকাররাশি  
 খুলিয়া ফেলেছি দূরে । দাও হস্তে তুলি  
 নিজ হাতে তোমার অমোঘ শরগুলি,  
 তোমার অক্ষয় তূণ । অস্ত্রে দীক্ষা দেহো  
 রণগুরু । তোমার প্রবল পিতৃশ্নেহ  
 ধ্বনিয়া উঠুক আজি কঠিন আদেশে ।

করো মোরে সম্মানিত নব বীরবেশে,  
 ছরুহ কর্তব্যভারে, ছঃসহ কঠোর  
 বেদনায় । পরাইয়া দাও অঙ্গে মোর  
 ক্ষতচিহ্ন-অলংকার । ধন্য করো দাসে  
 সফল চেষ্টায় আর নিঃফল প্রয়াসে ।  
 ভ্রাবের ললিত ক্রোড়ে না রাখি নিলীন  
 কর্মক্ষেত্রে, করি দাও সক্ষম স্বাধীম ।



৭

হে রাজেন্দ্র, তোমা-কাছে নত হতে গেলে  
 যে উর্ধ্ব উঠিতে হয় সেথা বাহু মেলে  
 লহো ডাকি সুহৃগম বন্ধুর কঠিন  
 শৈলপথে— অগ্রসর করো প্রতিদিন  
 যে মহান্ পথে তব বরপুত্রগণ  
 গিয়াছেন পদে পদে করিয়া অর্জন  
 মরণ-অধিক দুঃখ ।

শুগো অন্তর্যামী

অন্তরে যে রহিয়াছে অনির্বাণ আমি  
 দুঃখে তার লব আর দিব পরিচয় ।  
 তারে যেন শ্লান নাহি করে কোনো ভয় ।  
 তারে যেন কোনো লোভি না করে চঞ্চল ।  
 সে যেন জ্ঞানের পথে রহে সমুজ্জ্বল,  
 জীবনের কর্মে যেন করে জ্যোতি দান,  
 মৃত্যুর বিশ্রাম যেন করে মহীয়ান ।

তুমি সর্বাশ্রয়, এ কি শুধু শূন্যকথা ।  
 ভয় শুধু তোমা'পরে বিশ্বাসহীনতা  
 হে রাজন্ !

লোকভয় ? কেন লোকভয়  
 লোকপাল ! চিরদিবসের পরিচয়  
 কোন্ লোক-সাথে । রাজভয় কার তরে  
 হে রাজেন্দ্র ! তুমি যার বিরাজ' অন্তরে  
 লভে সে কারার মাঝে ত্রিভুবনময়  
 তব ক্রোড়, স্বাধীন সে বন্দীশালে । মৃত্যুভয়  
 কী লাগিয়া হে অমৃত ! ছ দিনের প্রাণ  
 লুপ্ত হলে তখনি কি ফুরাইবে দান ।  
 এত প্রাণদৈন্য, প্রভু, ভাগ্যরেতে তব ?  
 সেই অবিশ্বাসে প্রাণ ঝাঁকড়িয়া রব ?

কোথা লোক, কোথা রাজা, কোথা ভয় কার ।  
 তুমি নিত্য আছ, আমি নিত্য সে তোমার ।

আমারে সৃজন করি যে মহাসম্মান  
 দিয়েছ আপন হস্তে, রহিতে পরান  
 তার অপমান যেন সহ্য নাহি করি ।  
 যে আলোক জ্বালায়েছ দিবসশর্বরী  
 তার উর্ধ্ব শিখা যেন সর্ব উচ্চে রাখি,  
 অনাদর হতে তারে প্রাণ দিয়া ঢাকি ।  
 মোর মনুষ্যত্ব সে যে তোমারি প্রতিমা,  
 আত্মার মহত্বে মম তোমারি মহিমা  
 মহেশ্বর ।

সেথায় যে পদক্ষেপ করে,  
 অবমান বহি আনে অবজ্ঞার ভরে,  
 হোক-না সে মহারাজ বিশ্বমহীতলে  
 তারে যেন দণ্ড দিই দেবদ্রোহী ব'লে  
 সর্বশক্তি লয়ে মোর । যাক আর সব,  
 আপন গৌরবে রাখি তোমার গৌরব ।

তুমি মোরে অর্পিয়াছ যত অধিকার  
 ক্ষুণ্ণ না করিয়া কভু কণামাত্র তার  
 সম্পূর্ণ সঁপিয়া দিব তোমার চরণে  
 অকুণ্ঠিত রাখি তারে বিপদে মরণে—  
 জীবন সার্থক হবে তবে ।

### চিরদিন

জ্ঞান যেন থাকে মুক্ত, শৃঙ্খলবিহীন ;  
 ভক্তি যেন ভয়ে নাহি হয় পদানত  
 পৃথিবীর কারো কাছে ; শুভচেষ্টা যত  
 কোনো বাধা নাহি মানে কোনো শক্তি হতে ;  
 আত্মা যেন দিবারাত্রি অব্যাহত শ্রোতে  
 সকল উত্তম লয়ে ধায় তোমা পানে  
 সর্ব বন্ধ টুটি । সদা লেখা থাকে প্রাণে—

তুমি যা দিয়েছ মোরে অধিকারভার  
 তাহা কেড়ে নিতে দিলে অমান্য তোমার

ত্রাসে লাজে নতশিরে নিত্য নিরবধি  
 অপমান অবিচার সহ করে যদি  
 তবে সেই দীনপ্রাণে তব সত্য হয়  
 দণ্ডে দণ্ডে ম্লান হয় । দুর্বল আত্মায়  
 তোমারে ধরিতে নারে দৃঢ়নিষ্ঠাভরে  
 ক্ষীণপ্রাণ তোমারেও ক্ষুদ্রক্ষীণ করে  
 আপনার মতো— যত আদেশ তোমার  
 পড়ে থাকে, 'আবেশে দিবস কাটে তার ।  
 পুঞ্জ পুঞ্জ মিথ্যা আসি গ্রাস করে তারে  
 চতুর্দিকে ; মিথ্যা মুখে, মিথ্যা ব্যবহারে,  
 মিথ্যা চিত্তে, মিথ্যা তার মস্তক মাড়ায়ে—  
 না পারে তাড়াতে তারে উঠিয়া দাঁড়ায়ে ।

॥ অপমানে নতশির ভয়ে-ভীত জন  
 ॥ মিথ্যারে ছাড়িয়া দেয় তব সিংহাসন ।

তোমার গ্ৰাহ্যের দণ্ড প্রত্যেকের করে  
 অর্পণ করেছ নিজে । প্রত্যেকের 'পরে  
 দিয়েছ শাসনভার হে রাজাধিরাজ ।  
 সে গুরু সম্মান তব সে ছরুহ কাজ  
 নমিয়া তোমাতে যেন শিরোধার্য করি  
 সবিনয়ে । তব কার্ণে যেন নাহি ডরি  
 কভু করে ।

ক্ষমা যেথা ক্ষীণ দুর্বলতা,  
 হে রুদ্র, নিষ্ঠুর যেন হতে পারি তথা  
 তোমার আদেশে । যেন রসনায় মম  
 সত্যবাক্য ঝলি উঠে খরখড়াসম  
 তোমার ইঙ্গিতে । যেন রাখি তব মান  
 তোমার বিচারাসনে লয়ে নিজ স্থান ।

(অগ্ৰায় যে করে আর অগ্ৰায় যে সহে  
 তব ঘৃণা যেন তারে ভৃগসম দহে)

১৩

আমি ভালোবাসি, দেব, এই বাঙালার  
 দিগন্তপ্রসার ক্ষেত্রে যে শান্তি উদার  
 বিরাজ করিছে নিত্য, মুক্ত নীলাশ্বরে  
 অচ্ছায় আলোক গাহে বৈরাগ্যের স্বরে  
 যে ভৈরবীগান, যে মাধুরী একাকিনী  
 নদীর নির্জন তটে বাজায় কিংকিণী  
 তরল কল্লোলরোলে, যে সরল স্নেহ  
 তরুচ্ছায়া-সাথে মিশি স্নিগ্ধপল্লিগেহ  
 অঞ্চলে আবরি আছে, যে মোর ভবন  
 আকাশে বাতাসে আর আলোকে মগন  
 সন্তোষে কল্যাণে প্রেমে—

করো আশীর্বাদ

যখন তোমার দূত আনিবে সংবাদ  
 তখন তোমার কার্ঘ্যে আনন্দিত মনে  
 সব ছাড়ি যেতে পারি ছুঁখে ও মরণে ।

এ নদীর কলধ্বনি যেথায় বাজে না  
 মাতৃকলকণ্ঠসম, যেথায় সাজে না  
 কোমলা উর্বরা ভূমি নবনবোৎসবে  
 নবীনবরনবস্ত্রে যৌবনগৌরবে  
 বসন্তে শরতে বরষায়, রুদ্ধাকাশ  
 দিবসরাত্রিরে যেথা করে না প্রকাশ  
 পূর্ণপ্রস্ফুটিতরূপে, যেথা মাতৃভাষা  
 চিত্ত-অন্তঃপুরে নাহি করে যাওয়া-আসা  
 কল্যাণী হৃদয়লক্ষ্মী, যেথা নিশিদিন  
 কল্পনা ফিরিয়া আসে পরিচয়হীন\*  
 পরগৃহদ্বার হতে পথের মাঝারে—

সেখানেও যাই যদি মন যেন পারে  
 সহজে টানিয়া নিতে অন্তহীন স্রোতে  
 তব সদানন্দধারা সর্বঠাই হতে ।



১৫

আমার সকল অঙ্গে তোমার পরশ  
 লগ্ন হয়ে রহিয়াছে রজনীদিবস  
 প্রাণেশ্বর, এই কথা নিত্য মনে আনি  
 রাখিব পবিত্র করি মোর তনুখানি ।

মনে তুমি বিরাজিছ হে পরমজ্ঞান,  
 এই কথা সদা স্মরি মোর সর্বধ্যান  
 সর্বচিন্তা হতে আমি সর্বচেষ্টা করি  
 সর্বমিথ্যা রাখি দিব দূরে পরিহরি ।

হৃদয়ে রয়েছে তব অচল আসন,  
 এই কথা মনে রেখে করিব শাসন  
 সকল কুটিল দ্বেষ, সর্ব অমঙ্গল—  
 প্রেমেরে রাখিব করি প্রস্ফুট নির্মল ।

সর্বকর্মে তব শাক্ত এই জেনে সার  
 করিব সকল কর্মে তোমা'রে প্রচার ।

অচিন্ত্য এ ব্রহ্মাণ্ডের লোকলোকান্তরে  
 অনন্ত শাসন ঝাঁর চিরকালতরে  
 প্রত্যেক অণুর মাঝে হতেছে প্রকাশ,  
 যুগে যুগে মানবের মহা-ইতিহাস  
 বহিয়া চলেছে সদা ধরণীর 'পর  
 ঝাঁর তর্জনীর ছায়া, সেই মহেশ্বর  
 আমার চৈতন্য-মাঝে প্রত্যেক পলকে  
 করিছেন অধিষ্ঠান ; তাঁহারি আলোকে  
 চক্ষু মোর দৃষ্টিদীপ্ত ; তাঁহারি পরশে  
 অঙ্গ মোর স্পর্শময় প্রাণের হরষে ।

যেথা চলি, যেথা রহি, যেথা বাস করি,  
 প্রত্যেক নিশ্বাসে মোর এই কথা স্মরি  
 আপন মস্তক-পরে সর্বদা সর্বথা  
 বহিব তাঁহার গর্ব, নিজেয় নত্নতা ।

১৭

[না গণি মনের ক্ষতি ধনের ক্ষতিতে  
 হে বরণ্য, এই বর দেহো মোর চিতে ।  
 যে ঐশ্বর্যে পরিপূর্ণ তোমার ভুবন  
 এই তৃণভূমি হতে সুদূর গগন—  
 যে আলোকে, যে সংগীতে, যে সৌন্দর্যধনে,  
 তার মূল্য নিত্য যেন থাকে মোর মনে  
 স্বাধীন সবল শান্ত সরল সন্তোষ ।

অদৃষ্টেরে কভু যেন নাহি দিই দোষ  
 কোনো ছুঃখ কোনো ক্ষতি-অভাবের তরে  
 বিশ্বাদ না জন্মে যেন বিশ্বচরাচরে  
 ক্ষুদ্রখণ্ড হারাইয়া । ধনীর সমাজে  
 স্থান যদি নাহি হয়, জগুতের মাঝে  
 আমার আসন যেন রহে সর্ব ঠাই ।  
 হে দেব, একান্ত চিন্তে এই বর চাই ]

তাঁরি হস্ত হতে নিয়ো তব ছঃখভার  
 হে ছঃখী, হে দীনহীন । দীনতা তোমার  
 ধরিবে ঐশ্বর্যদীপ্তি যদি নত রহে  
 তাঁরি দ্বারে । আর কেহ নহে নহে নহে-  
 তিনি ছাড়া আর কেহ নাই ত্রিসংসারে  
 যার কাছে তব শির লুটাইতে পারে ।

পিতৃরূপে রয়েছেন তিনি, পিতৃ-মাতা  
 নমি তাঁরে । তাঁহারি দক্ষিণ হস্ত রাজে  
 ঞ্চায়দণ্ড-'পরে, নতশিরে লই তুলি  
 তাহার শাসন । তাঁরি চরণ-অঙ্গুলি  
 আছে মহত্বের 'পরে, মহতের দ্বারে  
 আপনারে নম্র ক'রে পূজা করি তাঁরে ।

তাঁরি হস্তস্পর্শরূপে করি, অনুভব  
 মস্তকে তুলিয়া লই ছঃখের গৌরব ।

১৯

মুক্ত করো, মুক্ত করো নিন্দাপ্রশংসার  
 ছশ্ছেছ শৃঙ্খল হতে । সে কঠিন ভার  
 যদি খসে যায় তবে মানুষের মাঝে  
 সহজে ফিরিব আমি সংসারের কাজে—  
 তোমারি আদেশ শুধু জয়ী হবে নাথ ।

তোমার চরণপ্রান্তে করি প্রণিপাত  
 তব দণ্ড পুরস্কার অন্তরে গোপনে  
 লইব নীরবে তুলি ; নিঃশব্দ গমনে  
 •চলে যাব কর্মক্ষেত্র-মাঝখান দিয়া  
 বহিয়া অসংখ্য কাজে একনিষ্ঠ হিয়া,  
 সঁপিয়া অব্যর্থ গতি সহস্র চেষ্টায়  
 এক নিত্য ভক্তিবলে ; নদী যথা ধায়  
 লক্ষ লোকালয়-মাঝে নানা কর্ম সারি  
 সমুদ্রের পানে লয়ে স্বক্ৰহীন বারি ।

২০

বাসনারে খর্ব করি দাও হে প্রাণেশ ।  
 সে শুধু সংগ্রাম করে লয়ে একলেশ  
 বৃহতের সাথে । পণ রাখিয়া নিখিল  
 জিনিয়া নিতে সে চাহে শুধু একতিল ।  
 বাসনার ক্ষুদ্র রাজ্য করি একাকার  
 দাও মোরে সন্তোষের মহা-অধিকার ।

অযাচিত যে সম্পদ অজস্র আকারে  
 উষার আলোক হতে নিশার আধারে  
 জলে স্থলে রচিয়াছে অনন্ত বিভব—  
 সেই সর্বলভ্য সুখ অমূল্য দুর্লভ  
 সব চেয়ে । সে মহা-সহজ সুখখানি  
 পূর্ণশতদলসম কে দিবে গো আনি  
 জলস্থল-আকাশের মাঝখান হতে  
 ভাসাইয়া আপনারে সহজের স্রোতে ।

২১

শক্তি মোর অতি অল্প, হে দীনবৎসল,  
 আশা মোর অল্প নহে । তব জলস্থল  
 তব জীবলোক-মাঝে যেথা আমি যাই,  
 যেথায় দাঁড়াই আমি সর্বত্রই চাই  
 আমার আপন স্থান । দানপত্রে তব  
 তোমার নিখিলখানি আমি লিখি লব ।

আপনারে নিশিদিন আপনি বহিয়া  
 প্রতিক্ষণে ক্লান্ত আমি । শ্রান্ত সেই হিয়া  
 তোমার সবার মাঝে করিব স্থাপন  
 তোমার সবারে করি আমার আপন ।  
 নিজ ক্ষুদ্র দুঃখসুখ জলঘটসম  
 চাপিছে দুর্ভর ভার মস্তকেতে মম—  
 ভাঙি তাহা ডুব দিব বিশ্বসিঙ্ঘুনীরে,  
 সহজে বিপুল জল বহি যাবে শিরে ।

মাঝে মাঝে কভু যবে অবসাদ আসি  
 অস্তুরের আলোক পলকে ফেলে গ্রাসি,  
 মন্দপদে যবে শ্রান্তি আসে তিল তিল  
 তোমার পূজার বৃত্ত করে সে শিথিল  
 ত্রিয়মাণ— তখনো না যেন করি ভয়,  
 তখনো অটল আশা যেন জেগে রয়  
 তোমা-পানে ।

তোমা-’পরে করিয়া নির্ভর  
 সে শ্রান্তির রাত্রে যেন সকল অস্তুর  
 নির্ভয়ে অর্পণ করি পথধূলিতলে  
 নিদ্রারে আহ্বান করি । প্রাণপণ বলে  
 ক্লান্তচিত্তে নাহি তুলি ক্ষীণ কলরব  
 তোমার পূজার অতি দরিদ্র উৎসব ।

(রাত্রি এনে দাও তুমি দিবসের চোখে  
 আবার জাগাতে তারে নবীন আলোকে ।



২৩

তব কাছে এই মোর শেষ নিবেদন—  
 সকল ক্ষীণতা মম করহ ছেদন  
 দৃঢ়বলে অন্তরের অন্তর হইতে  
 প্রভু মোর ।

বীর্ষ দেহো সুখের সহিতে  
 সুখেরে কঠিন করি । বীর্ষ দেহো দুখে  
 বাহে দুঃখে আপনারে শাস্তস্মিত মুখে  
 পারে উপেক্ষিতে । ভকতিরে বীর্ষ দেহে  
 কৰ্মে যাহে হয় সে সফল, শ্রীতিস্নেহ  
 পুণ্যে ওঠে ফুটি । বীর্ষ দেহো ক্ষুদ্র জনে  
 না করিতে হীনজ্ঞান, বলের চরণে  
 না লুটিতে । বীর্ষ দেহো চিত্তেরে একাব  
 প্রত্যাহের তুচ্ছতার উর্ধ্ব দিতে রাখি ।

বীর্ষ দেহো তোমার চরণে পাতি শির  
 অহর্নিশি আপনারে রাখিবারে স্থির ।

